

# Perkim, UniKL anjur Kembara Korban di Satun

**B**ERKONGSI kegembiraan bersama Muslim kurang bernasib baik, Institut Teknologi Maklumat Malaysia, Universiti Kuala Lumpur (UniKL-MIIT) dan Kelab Pertubuhan Kebajikan Islam Malaysia (Perkim) baru-baru ini menganjurkan Kembara Ilmu dan Korban Perdana di Kampung Chalung, Satun, Thailand.

Program dengan kerjasama Yayasan Ikhlas itu disertai seramai 30 peserta termasuk pelajar, alumni dan pegawai UniKL.

Timbalan Dekan Kampus Gaya Hidup Pembangunan Pelajar UniKL-MIIT, **Dr. Norsazali Abdullah** berkata, dalam program itu sebanyak lima lembu dan dua kambing dikorbankan untuk diagihkan kepada penduduk setempat.



**PESERTA** melapah lembu korban sambil dibantu oleh penduduk tempatan.

“Ibadah korban merupakan satu daripada jalan untuk mendekatkan diri kepada Allah dan umumnya ibadah ini adalah dituntut bagi individu yang berkemampuan,” katanya

Pelajar bersama sukarelawan turut membantu mengagihkan daging korban dan barangan makanan kepada 10 keluarga daif dan miskin di pedalaman kampung itu menggunakan

kenderaan pacuan empat roda.

Lebih menyentuh hati, terdapat dalam kalangan penduduk kampung yang menjalani kehidupan seharian dengan bertemankan pelita di pondok usang beratapkan rumbia sejak 50 tahun lalu.

Norsazali turut menyampaikan sumbangan rehal, al-Quran, sejadah dan telekung serta sumbangan wang tunai kepada Pengerusi Sekolah Agama Rakyat Kampung Chalung, Abdul Qadir Hasuk bagi pembangunan masjid dan keselesaan penduduk kampung.

Program kembara diteruskan dengan menziarah Rumah Anak Yatim Emirates yang terletak tidak jauh dari Kampung Chalung.

Meskipun hujan dan ribut melanda, ia tidak mematahkan semangat mahasiswa untuk menabur bakti, meraikan dan meluangkan masa bersama anak-anak yatim dengan mengadakan majlis akikah serta pembelajaran bahasa Melayu, bahasa Inggeris dan Mandarin.

Kegembiraan terukir pada wajah anak-anak yatim ketika kakitangan UniKL-MIIT menyampaikan sumbangan alat tulis.

Pada kunjungan itu, Norsazali turut menyampaikan cenderahati kenang-kenangan kepada Pengerusi Rumah Anak Yatim Emirates, Useng Walong.-

**MOHD. SYAHRIL ROSDI**



**PELAJAR** UniKL-MIIT yang menyertai Program Kembara Ilmu dan Korban Perdana Kampung Chalung, Satun, Thailand, baru-baru ini.